

Kempen berhemah yakinkan pengundi



**NOOR MOHAMAD
SHAKIL HAMEED**

WALAU apapun pegangan ideologi dan fahaman politik kita satu perkara yang pasti ialah setiap rakyat Malaysia adalah saudara senegara. Hakikatnya, selama ini kesatuan dan perpaduan antara kaum telah menjadi tunjang dan manifestasi kepada pembangunan negara dan kejayaan masyarakat dalam pelbagai aspek. Justeru besarlah harapan agar politik tidak menjadi garis pemisah antara kaum yang akhirnya akan menghancurkan rakyat dan juga negara ini.

Ironinya politik wajar menjadi manifestasi untuk perkukuh semangat perpaduan dan kebangsaan dalam sanubari setiap rakyat dan bukan sebaliknya. Justeru memasuki fasa tempoh berkempen Pilihan Raya Umum Ke-14 (PRU-14) ini besarlah harapan kita agar setiap calon dan parti yang bertanding dapat menghindari budaya politik perkauman dan politik kebencian.

Sebaliknya gunakanlah tempoh berkempen yang diperuntukkan ini sebaik mungkin untuk menarik sokongan lebih 14 juta pengundi untuk mendapatkan mandat di 222 kerusi Parlimen dan 505 kerusi Dewan Undangan Negeri (DUN) di seluruh negara.

Sebagai pengundi, penulis yakin rakyat telah meletak satu penanda aras yang cukup jelas sebagai kriteria calon yang mereka mahukan. Justeru calon perlu menonjolkan kriteria idaman pengundi itu ketika berkempen supaya pada hari pengundian kelak para pengundi akan nekad dan memangkah tanpa berbelah bagi ataupun ragu-ragu.

Antara kriteria penting ialah pengundi tidak mahu calon menyebarkan fitnah mahupun cerita palsu untuk mengaburi mata pengundi.

Seperti yang ramai jangkakan PRU-14 digambarkan bakal mencetuskan tsunami fitnah yang



KELUARLAH beramai-ramai untuk mengundi disebabkan tempoh lima tahun akan datang cukup kritis kerana bakal menentukan hala tuju Malaysia untuk menjadi negara maju berpendapatan tinggi. - GAMBAR HIASAN/BERNAMA

mampu mengelirukan rakyat. Jadi diharapkan calon akan berhati-hati ketika berkempen, jangan semudah itu mengeluarkan sesuatu kenyataan mahupun fakta yang belum tentu sahih mahupun betul.

Pastikan apa yang keluar dari mulut itu adalah ucapan baik, berhemah, beradab dan maklumat tepat serta betul. Kita tidak mahu ucapan calon dijadikan senjata untuk menembaknya balik apabila ia adalah fitnah. Dan sudah semestinya pengundi akan marah, kecewa, rasa tertipu dan tidak mahu calon ini menjadi wakil mereka kelak.

Politik perlu menjadi alat penyatu seluruh rakyat negara ini, jadi jangan jadikan ia sebagai senjata untuk memecahbelahkan keharmonian dan perpaduan dalam kalangan rakyat hanya kerana semata-mata mengejar kepentingan peribadi.

Ketika berkempen elak menyentuh isu-isu sensitif seperti soal kaum dan agama yang menjadi pantang larang utama rakyat Malaysia selama ini.

Hal ini cukup penting kerana dewasa ini kita dapat lihat seolah-olah ada gerakan untuk menceetuskan provokasi dalam kalangan

masyarakat melalui penyemaian budaya politik perkauman dan kebencian. Situasi ini mula membangkitkan rasa tidak puas hati dalam kalangan rakyat dan kita khuatir kesannya kelak cukup memudaratkan semua pihak. Hentikanlah budaya kempen tidak sihat seperti ini yang pastinya akan menyebabkan pengundi marah dan menolak calon pada hari pengundian kelak.

Kita juga berharap calon yang bertanding tidak menjanjikan 'bulan dan bintang' kepada pengundi. Berpijaklah di bumi nyata ketika mahu menaburkan aku janji kepada pengundi.

Setiap calon perlu ukur baju di badan sendiri sebelum berjanji kepada pengundi kerana perlu diingatkan pengundi akan menuntut kelak segala janji manis yang diberikan semasa meriah undi ketika berkempen.

Tempoh berkempen juga kebiasaannya akan digunakan oleh pengundi terutamanya pengundi baharu dan muda untuk menilai karakter, ketekunan, keyakinan serta aura seseorang calon yang bertanding. Dilema ini turut akan menghantui calon senior atau muka lama kerana citarasa pengundi muda sukar diduga dan

diramal. Jadi mahu tidak mahu semua calon yang bertanding baik muka baharu mahupun orang lama tidak boleh ambil mudah aspek ciri-ciri peribadi calon yang menjadi perhatian pengundi sepanjang tempoh berkempen ini.

Calon perlu menggunakan pendekatan yang lebih berhemah dan beradab untuk mencuri hati setiap kategori pengundi tanpa mengira umur, kedudukan, jantina dan bangsa.

Maka gunakanlah tempoh berkempen ini untuk menonjolkan aura dan kehebatan yang ada pada diri untuk menarik perhatian dan minat semua kategori pengundi di kawasan masing-masing. Perlu diingat jika menang anda akan diangkat sebagai pemimpin masyarakat jadi tidak salah untuk pengundi meletakkan tanda aras yang tinggi dalam soal keperibadian seperti ini.

Dan akhirnya kepada 14.9 juta pengundi yang layak mengundi kali ini kita berharap keluarlah beramai-ramai pada hari pengundian untuk menunaikan tanggungjawab masing-masing kepada negara. Jangan terus memberi pelbagai alasan sehingga akhirnya menggadai masa depan negara dan anak cucu.

Lima tahun yang akan datang adalah satu tempoh yang cukup penting dan kritis kerana bakal menentukan hala tuju dan masa depan negara menuju impian menjadi negara maju berpendapatan tinggi.

Jadi fikir masak-masak sebelum memangkah, nilai dengan rasional semua aku janji dan manifesto yang telah dikemukakan dan pastikan kita memilih calon yang betul dan tepat tanpa terpengaruh dengan apa jua fitnah mahupun berita palsu. Semoga pilihan kita kelak akan terus membantu kelangsungan kemajuan rakyat dan pembangunan negara.